

## **KUIS bantu pelajar atasi isu lapar**

**February 2, 2016**

**OLEH: HAFIZAN TAIB (<https://selangorkini.my/2016/02/kuis-bantu-pelajar-atasi-isu-lapar/>)**

BANDAR SERI PUTRA, 2 FEB: Isu pelajar berlapar akibat tidak makan mendapat perhatian Kolej Universiti Islam Antarabangsa Selangor (KUIS) yang membantu golongan terbabit menerusi bekalan makanan percuma.

Timbalan Rektor Pengurusan Korporat KUIS, Dr Zulkifli Abd Hamid, berkata usaha digerakkan universiti terbabit bermula pada tahun lalu dengan kumpulan sasaran dibantu bagi mengatasi masalah dihadapi.

Katanya, bantuan terbabit adalah daripada pensyarah selain yayasan dan pusat zakat yang terdapat di universiti itu yang mendapat sumbangan pelbagai pihak dan orang ramai.

“Yayasan dan pusat zakat di KUIS memainkan peranan bagi membantu golongan sasaran ini kerana bukan setakat tidak makan tetapi terdapat juga kumpulan pelajar tidak mampu membayar juran pengajian.

“Ini kerana KUIS sebagai sebuah Institusi Pengajian Tinggi Swasta (IPTS) bukan semua pelajarinya mendapat bantuan dalam pengajian,” katanya kepada SelangorKini dan percaya kemudahan sama turut terdapat di universiti lain di negara ini.

Mengulas lanjut, beliau berkata, biarpun tidak membabitkan jumlah besar iaitu kira-kira satu atau dua peratus daripada lebih 8,000 pelajar di universiti itu tetapi ia perlu dilihat dari sudut positif bagi penyelesaiannya.

Katanya, ini kerana pelajar jika miskin akan mempunyai rasa rendah diri dan sikap tidak meminta-minta.

“Kita perlu mempunyai daya inisiatif bagi melihat pelajar sama ada mereka layak bagi bantuan ini apabila kebiasaannya maklumat diperoleh daripada rakan lejar serta Majlis Pimpinan Pelajar (MPP).

“Walaupun terdapat lebih kurang 400 pelajar miskin tetapi yang layak kira-kira 130 orang sahaja kerana sebahagian mereka mendapat bantuan tajaan pusat zakat negeri masing-masing,” katanya.

Beliau berkata, bekalan makanan percuma diberikan tidak disediakan pada setiap hari dan hanya pada hari tertentu seperti tiga hari seminggu dengan kaedah dipraktikkan membolehkan pelajar berjimat cermat.

Selain itu, katanya, KUIS turut membekalkan makanan berbuka percuma kepada pelajar universiti pada setiap Isnin dan Khamis kerana kebanyakan pelajar berpuasa pada hari berkenaan.

“Mungkin universiti lain menggunakan kaedah berbeza seperti memberikan wang tunai kepada pelajar tetapi kita di KUIS mengguna pakai kaedah memberikan bantuan makanan bagi mengatasi masalah pelajar sebegini,” katanya menambah isu itu bukan baharu kerana telah berlarutan sejak 1970an hingga kini.

Zulkifli berkata, keprihatinan pengurusan KUIS demi mengatasi masalah itu adalah bagi menunjukkan kepimpinan terbaik supaya menjadi contoh kepada pelajar yang akan mewarisi kepimpinan negara pada masa hadapan.

“Bila hari ini kita menunjukkan kepimpinan terbaik antara generasi tua dan muda maka kaedah sama akan mereka gunakan kepada generasi akan datang.

“Ia bertepatan dengan kata-kata Yusuf al-Qaradawi (Pengerusi Kesatuan Ulama Islam Antarabangsa) iaitu jika ingin melihat generasi akan datang maka perlu melihat generasi yang ada pada hari ini,” katanya.

.